



聖宋名賢五百家播芳大全文粹卷四十七
賀啟



賀文太師啟

李成季

光膺策命入拜師臣三公惟人大厦有棟梁之任一
相處內四方如泰華之安天扶聖君人望元老歡樂
精神之會流通上下之情禮無與隆時所罕遇恭惟
某官孕靈嶽秀配德坤元器深厚而有容道直方
而不撓武足以戡定亂略文足以潤色聖謨可託大

事則社稷之臣不親細務則帝王之佐進人如已愛物以情碩畫嘉謨撫寧於華夏陰功隱惠孚感於神明故能業亮四朝身兼五福出入將相幾四十年古今勲勞無一二輩屬真人之嗣服攬庶事以圖新謂國軍禁令有未決之疑左右輔弼皆後來之後俾辭留鑰入造內朝集冠蓋於都門羅饗殮於候館衮衣已往難留洛水之舊邦皓首復來共識仁皇之真相龍光疊被衢路榮觀于今熙河之餉餽甚艱遼夏之疆隅未復不足者九年之食已傷者百姓之財將冗而卒驕吏繁而負溢永賴著龜之舊德克開社稷之遠圖俯陪調鼎之司獨踐位魏之地壽考之美方邁德於汾陽禮樂之功更仰成於姬旦某素惟鄙昧久荷獎提台座熒煌悵披雲之在望駕蹤疲曳但服駕以長鳴

賀蔡太師啟

翟公巽

伏覩詔制正月一日大慶殿朝賀受傳國入寶 太

尉冊拜太師者仰止三朝之老蔚為萬乘之師裂以山川世胄之封崇以鈇鉞專征之器貴窮人爵克享天心古者天子有七人之爭臣太師首三公而論道所以儀刑海內輔導帝躬嚴朝廷則爵為達尊事德義則貴有所屈成湯先學於伊尹必有所不召之臣穆公無人乎子思不能安長者之側有來命世之哲以起非常之功恭惟太師道濟彌綸文能經緯非予覺之誰也豈曰友之云乎王曰嗚呼父師作祇命

周公之冊余惟克邁乃訓繼舊學甘盤之賢極名器則禮敬益隆咨典刑則老成為重就訪大事必先愔史之乞言俾乘安車參用黃門之設凡底于五典論厥九疇以鎮定如巖石之瞻以博厚若阿衡之倚一國之巨室所慕為政不難天下之大老來歸其子焉往用能制作禮樂頒度量於明堂寅亮聖明受泰元之神筴肇稱寶玉於赫祲容然而無兢維人惟德其物昔有倚相能道訓典晉大夫失問於白珩子反善

理兵戎秦使者改觀於和璧不有君子將焉取斯洪
惟熙洽盛治之聖朝相以瑰瑋光明之人傑光于史
冊配君陳畢命之書載之聲詩詠嵩高烝民之雅

賀劉太師啟

石敏若

帝制坦明誕布外朝之聽師垣峻極有嚴上宰之班
極數名以稱格天之功隆體貌以示尊賢之等名實
之加四達爵祿之報兩崇成命式孚有生胥慶伏以
神文廣運若臯陶則見而知之聖武布昭舉伊尹不

仁者遠矣允若君臣之同德能致帝王之極功自古
以然於今為盛恭惟某官才貫三極智周萬微每
見之於未形常行其所無事道合聖賢之周舍身係
社稷之安危天眷有邦昇斯民之嘉靖帝選于眾越
諸老以登賢作興於一時之間超軼於千載之上治
成德備而百度理施博制廣而四夷賓質之於詩書
而有稽告之於神明而無愧嗣奉緝熙之典丕承燕
翼之休協三代受命之符厚其戩穀作八瑞鎮邦之

寶登以端元方溟澤之均行豈鼎司之可後肆頌顯
冊承顓師言位著有光諧師臣之步武陞簾加峻壯
王國之尊安伏念某結約亡奇間關少予病槁何用
亦參萬國之春弊帚自珍孰辨千金之享倘未亡於
簪屨終有賴於錘鑪望履無階但想鷹揚之表飾辭
有腆仰伸燕賀之儀

賀文太師啟

宋文淵

重膺顯冊榮拜上公委軍國之深機奪丘園之至樂

中外胥慶神人以和矧衣被於恩涵豈雷同於至樂
伏惟 某官直方而大含洪而光學為王者之師身
在當世之重出秉麾鉞入掌鈞衡堅一德而無二心
弼四世而歷三紀草木魚鼈以之而成若陰陽天地
以之而秦通功成不居身退自遂於脛得無疑之利
於漸為可用之儀方大人之繼明思厚德以載物還
以論道屬之經邦以鎮安華夷之情以負荷廟朝之
寄雖二帝上庠西序三王左學東膠方漢事桓榮之

尊魏優王祥之養姑記善於愷史或乞言於暇時莫
如進退之間獨係安危之大昔望吾君如舜翻然起
莘今欲天下一周老不歸魯富簡策難傳之事業有
丹莫狀之輝光某夙範陶鈞生全卯翼孤投塞壘遠
總兵戎脩廝役以無由望台光而展慶神馳心結意
在言殫

賀秦少保啟

汪彥章

伏頒明詔登用大儒疏榮三少之班正位百官之上

生成所及鼓舞斯同恭以某官言合六經學包萬
古由周公傳之孔子獨承師友之淵源惟尹躬暨于
成湯適應君臣之期會久借本兵之重多輸納誨之
忠方功名未究於經綸舉中外皆形之歎息蓋文物
於斯為盛欲平治捨公其誰故除書甫降於九天而
和氣遂充於四海某早蒙知獎叨被使令逢恩寵之
鼎新預生靈之鈞播雖官聯在遠莫能陪多士之班
然謠俗至公當採作烝民之雅

賀秦少保啟

鄭敦夫

玉檢告成載篤中興之緒麻綸敷旨茂昭夾輔之勳
祇服寵靈亟躋寅亮臚傳所暨公議攸歸 少保大
觀文吾道宗工斯文先覺規模國器士業相門吐論
皆前輩之風流落筆非後來之氣格飛英騰茂決科
獨步於一時盡忠竭嘉致身橫飛於兩地贊廟謨而
底定纂聖統以承休惟昔彝儀禮素降於列辟矧茲
異數位宜進於貳公未盡疇庸更陪行賦某自惟朽

鈍素出甄陶盛事會逢尚阻南州之小壘喜懷增劇
莫隨東閣之後塵展慶無從馳情惟切

賀韓丞相啟

唐子西

顯奉制麻延登宰席播騰九有懽慶一辭竊聞考元
龜以斷大謀不如舊德指喬木而稱故國未若世臣
才猷夙著於廟堂名實已隆於天下故社稷因之而
倚重而朝廷恃此以稽疑恭惟 某官器重海涵神
清玉粹天資攸稟有仁民愛物之心家學所傳皆論

道經邦之術藹揚令聞坦涉亨途頃任樞躔謀已深
於漢幄出臨閫寄澤未溥於商霖政地久虛僉言允
屬值聖朝之嗣服思輔相以迓衡召還三遷遂宅百
揆韋平盛事固無愧於古人房杜全功誠責全於今
日必將盡發胷中之蘊庶幾大慰海內之心某承乏
遐陬側聞除目阻遠潭潭之府莫趨兩兩之階叢拊
寸誠難形尺牘

賀左丞相啟

李成季

拜命大庭分聯左揆天人相與君相並興千載一時
永契太平之會四方萬里共蒙生氣之和竊以舜帝
舉臯陶而竄不仁高宗命傳說以求古訓因先王而
為政為天下以得人竦佩遺風復見今日顧安危之
所繫宜上下之稱歡恭惟 某官名世真儒先民先
覺稟三才之氣思則無邪以四海為心達則兼善智
大而必先於遠致行高而不可以小知未嘗枉己以
直人豈憚屈身而伸道三諫不聽漠無干澤之私萬

鍾何加惟有養恬之樂屬大明之紹服講庶政以圖
新急聞至言優禮元老以公議而自處為眾人之不
能匹夫未安深軫納溝之念至誠獨立靡懷濡足之
憂故進賢退惡而多士歸心興利去害而庶民不議
果膺睿渥參秉鈞衡飛鴻之遇順風已如夙志大旱
而作霖雨咸賴我公益秩萬世之安永尚一人之慶
某猥叨憐遇倍切懽愉限守州符阻造台屏

賀趙丞相啟

張全真

伏審決定大策建中興不拔之基褒賞元勳正上宰
久虛之位王廷孚號海寓交歡竊以赤舄袞衣美征
東之姬旦命圭相印答平蔡之裴公播在聲詩光于
簡冊况卻憑陵之巨敵有開恢復之宏規示丕勸于
羣工宜首鷹於異數恭惟 某官直方而不撓敦大
而有容獻納論思夙著排姦之節贊襄輔弼尤高經
遠之謀惟光武能推赤心而絳侯可屬大事會羽書
之遽至奉革輅以徂征師律一新坐據江山之險捷

書屢上幾成京觀之封致醜類之宵奔本嘉猷之宸
告射鵰賈勇雖多李廣之無雙指獸收功誰出蕭何
之第一宜班宸綽首冠台躔舍爵之賞既行歸疆之
期可待某逖聞誕告喜越常情昔忝同升謬託金蘭
之契老思自放願諧丘壑之求頌詠之私敷宣曷既

賀湯丞相啟

熊子復

伏審褒異真儒躡登元宰熙帝之載早並列於泰階
秉國之鈞首進顯於魁柄經綸雖久潤澤惟新恭惟

平章僕射相公毓粹昭回儲精峻極翔蛟龍躍虎
鳳炳馬華國之辭閉雷霆藏風雲渾然經世之度冠
殊科而挺出厯要路以橫飛勢不倚於冰山望自隆
於巖石絳灌雖毀不能使文帝之疑禹山既除宜首
用弱翁之相粵從樞筦躡正蒙司彌縫萬機粉澤百
度勒成曠典述丕顯之文謨結好殊鄰示允懷之漢
德崇儉以省國用惟公以收人才果疇專美之功遂
陟久虛之位身榮上衮心協前旒昔神文享國之長

繫宰相得人之盛然天聖之修真錄乃王文穆之持
綱而慶厯之申遼盟乃呂文靖之當軸節冗費則賈
魏公首建其議抑親黨則章郇公自守其謀雖舜帝
之有五臣足誇當世然周公之施四事并掩前人宜
乎史臣殫簡牘而屢書文士極翰墨而交頌况萬世
遇大聖方垂拱而仰成於一代為宗臣每彌縫而藏
用浩若元氣運于太虛人莫測其端倪物陰被其膏
澤某早窺崇仞遠託洪鈞名則甚微半世選舉而始

得學雖不輟過時勤苦而難成倘蒙造物之憐獲免
抗塵之賤則專具筆札盡心力於斯文率作歌詩尚
形容於今日

賀蔣丞相啟

洪景伯

伏審還位中階進居首鉉簡在上帝夙膺柄用之專
圖任舊人起副具瞻之切郵傳四出廟算一新竊以
舜以不得臯陶慮萬機之或壅湯則有若伊尹諒一
德之相依惟其實係安危於身故去猶失左右之手

本朝為盛前輩可稽趙韓王奪服於建隆之間式遵
古誼富鄭公牢辭於嘉祐之後第鬱師虞蓋遭變事
者務度其宜而為忠臣者在移其孝恭惟平章僕
射相公著龜先覺柱石壯猷應變成務而挺有祖風
同協寅恭恭而甚稱上意如丙吉之按邊瑣既預科
條若崔相之除吏負更公薦舉方任秉鈞之重遽罹
陟屺之艱位雖去於巖廊眷益深於黼辰肆舉奪情
之典益疇佐命之勲家事雖勤詎可辭於國事人心

既悅宜遂格於天心豈但復於中臺仍更陞於上衮
况十事說天子已前定於規摹則一代為宗臣庶永
扶於基業某猥貳九卿之列忝居百職之間宣制于
廷共儒紳之相慶立班于路迎相袞之來歸敢再扣
於崇墉輒自通於竿牘攘振弱植方依僊宇之摩空
纒紉輕帆或助神舟之濟海

賀劉丞相啟

劉夷叔

榮膺策命進掌綸衡十行傳於置郵四海為之歌訟

竊以爰立之任從古所難宣帝中興之功惟丙與魏
明皇勵精之治非宋則姚吉流於懦而相失之嚴崇
溺於權而景窘于用雖茂美績誠非全才故明皇愧
於守成而宣帝甘於雜伯致君同堯舜之盛接武繼
臯夔之賢治本得人朝廷增重恭惟 某官忠勤許
國康濟乘時遡遊於道德之淵源潤色以詩書之華
藻主上撫艱難之運受重寄於祖宗大臣以康濟之
資報異恩於君父屬雅懷而素定注上意以仰成天

地鬼神明其心鳥獸草木均其賜某受知最厚念咎
方深睹端揆之得賢喜宗祧之蒙福夙興夜寐敢忘
庇覆之恩飲水曲肱與享太平之樂

賀左丞相啓

何子固

伏審誕告帝庭崇登宰席君臣一道夷夏均伏恭以
某官天披英才人資先覺神明意用足以官使有
造之後髦談笑發揮足以酬酢無形之事變參元豐
之法從冠紹聖之辭林道德文章一世宗匠言議風

采四方表儀出處係天下之重輕卷舒為君子之消
長起從琳館服在巖廊夷考嘉猷峻躋揆路蓋聖賢
之相得若旦暮之可期豈思歲月之功始協雲龍之
會故有虞選眾必屬臯陶而湯后格天實資伊尹觀
神考所以遺公於今日之志與執事所以致忠於本
朝之心方且振起頽綱葺完舊典大脩一王之制作
追還三代之規模必使壞植散羣紹閱休於先烈豈
徒興滯補弊近收放於當年遂格元勳益隆昌運是

為天意豈獨人謀所以神感淵衷潛發文王之夢帝
思碩德式迎公旦之歸事映古今道先簡策某詩書
淺學口耳近功掃舍人之門未塞依歸之願望平津
之館空馳夙夜之心驩抃發中情誠並竭

賀左丞相啟

孫仲益

大庭作命揆路陞華鼎鉉不移首冠九官之右台符
增煥益隆四海之瞻某聞解琴瑟之絃所以正五行
調鼎鼐之實所以齊眾口蓋習治久安之弊而翫歲

愒日之多蟻穿弗填有潰隄抉石之憂蔓草不圖為
錯節盤根之患憚折肱之已誤顧反掌而奚難戒覆
車之轍則安焉易敗者之兵則勝矣恭惟 僕射相
公受天大任為國元臣屬當亡旰食之初承前人覆
餽之後練五色之石而欲試補天之手儲萬金之藥
而共推望國之工剔除邦蠹而復睹清明救療民瘼
而一消疲瘵丕冒惟新之化獨高再造之勲書郭中
令之考而與國均休享衛武公之年而與民偕樂頌

言如此輿論所同某枯朽陳人伶俜末路久託林居
之陋側聞廷渙之傳倍深喜躍之情實謂知憐之素
惟宰路播洪鈞之大每懷藜藿不採之恩而神仙隔
弱水之遙詎復雞犬同升之望

賀葉丞相啟

熊子復

伏審宸衷圖舊廟算倚平大老遄歸方總機廷之重
真儒柄用首躋鉉席之崇朝野具瞻華戎咸賴竊以
舉直而錯諸枉舜湯所以君萬邦舍藏而用則行孔

顏所以師百世既聖主察流言之害宜元臣當注意
之隆破斧而缺錡戕詎損周公之德濟川而作舟楫
迄資傳說之功恭惟 平章僕射相公任重降天才
高命世蚤膺親簡徧歷從途封駁無私事必參於典
故銓擬有序時更立於章程逮進貳於彌綸果深裨
於綜核功高眾忌日月無得而踰道直自將風雨不
改其度几爲暫聞於去國介圭復見於來朝張良運
籌已獨優於三傑魏相總職宜首贊於萬機豈特輔

重華協帝之勲正當究上策禦戎之備苟政刑明于
閒瑕有要有倫則道德成乎安強元侮无拂遠追景
德祥符之列近述熙寧元豐之摹其蚤出門墻叨居
省戶路車乘馬方瞻入覲之容袞衣繡裳亟聽登庸
之典既班庭而旅慶猥贄牘以寓誠廣廈萬間已幸
併蒙之庇洪鈞一氣尚希块土之陶

賀趙丞相啟

毛伯穎

光奉制書進登揆席得力收而先五帝克贊皇猷命

傳說而摠百官大凝臣績壘書誕告輿頌交欣竊以
炎運中微阨會偶丁於百六洪圖未艾咸登方繼于
五三將隆再造之勲必賴非常之佐帝思俾乂大拯
橫流民具爾瞻仰高巖石倘匪過人之英傑孰隆不
世之功名而况戎狄貪恠既稔豺狼之惡帥兵簡練
久韜熊虎之威宜獨制於中權用克清於大憝師直
為壯莫高狐偃之謀唯斷乃成實繫裴度之用攄兩
朝之宿憤折萬里之遐衝讀命彤庭始僉同於九列

申威紫塞遂震疊於四夷大哉聖謨恢此賢業恭惟

某官智周天緯學貫民彝體君子之中庸蹈賢人
之久大敦詩書而悅禮樂綽有成謀定社稷而安國
家自其素蘊凜乎天下之模楷蔚為朝廷之羽儀薦
更二府之榮獨任四方之責撥亂世反之正微斯人
誰與歸簡在帝心授以魁柄運動樞極法太微三光
之庭振理綱維清文昌萬化之本式是百辟格于皇
天錫秬鬯以告文人召伯獻萬年之頌受彤弓而揚

休命晉侯陳三觀之儀勲德兼隆古今莫二某字孱
陋質樸邀散材金馬石渠嘗遙行朝之表著銅魚竹
使自淪遠郡之簿書喜聞才館之開願備洪鑪之託
麀頭鼠目難逃冰鑑之明馬勃牛溲或備藥籠之用

賀秦丞相啟

汪彥章

廷揚孚號國拜元台有道而守四夷方懋中興之業
好要而論一相竄須夾輔之勲天意會同人心闔懌
恭以 某官運逢真主志在生民聚精神帷幄之中

絕體貌簪纓之上安危大計孰堪舉國而聽焉前後
數公方見得君之專者積三載處中之望副九重虛
左之求魁柄不移袞衣增煥方且收威權於王室示
風采於敵人取河北一百餘州今其時矣書汾陽一
十四考行且見之某久記洪鈞欣聞顯冊屬拘縻於
乘障阻趨走於班庭歲籥將中廟堂多暇冀忝鼎茵
之節永為宗社之休

賀張丞相啟

晁之道

恭審渙號大廷晉陞良弼宸衷簡注見擢用之得人
國勢尊榮知治安之有日伏惟慶慰竊以君臣之遇
古今至難玩歲愒日則必悔於臆臍趨事赴功則每
虞於掣肘故時君克斷裴度所以成功而朝議多違
羊祜不知如意自非天意悔禍人謀允臧則何能用
大度之言予以啟中興之運恭惟 某官奇才命世
妙略濟時洗日咸池功素高於社稷捫參蜀道名已
振於蠻夷雖更夷險之殊不替終始之遇屬傳羽檄

趣下鋒車復正位於鈞衡仍撫師於疆場運籌帷幄
而決勝於千里致醜虜之宵奔端委廟堂而為準於
百僚副輿人之夙望實惟圖舊何止策勲伊尹一德
以享天心無間然矣漢高五載而成帝業尚切遲之
益堅帶礪之盟增煥鼎鐘之勒某辱知最久贊喜尤
深聞海相從已熟衰殘之迹荆溪休老願諧退縮之
心頌詠之私名言罔既

賀左丞相啟

何文績

伏審寵錫元勳誕敷明命顯躋峻秩超正上台凡在
陶鈞舉同拊慰恭惟 某官高明純亮博大淵通器
周文武之宜道濟功名之會行其所學致身夔契之
間迄用有成躋俗唐虞之上方且增煥丕承之烈發
明垂裕之功廣學校以新人材睦宗枝以厚風化大
脩一王之制永圖萬事之康分飾師干遠平蠻徼山
川失其險阻冠帶被於遐荒文治既優武功復暢蓋
裴度有平蔡之烈不能致治於太平魏相推佐漢之

名尚愧弗通於征伐載惟成績獨掩前人某早以庸
虛厚蒙眷其方塵器使阻造公門懽頌之誠敷宣罔
既

賀魏丞相啟

孫仲益

伏審發冊疇庸揚庭布號楸佐王之學必有漢閣麒
麟之勳開負弼之詳果應渭水熊羆之兆恭惟 某
官受天大任躋世中興方當四十強仕之秋已展九
萬垂天之羽恢遠大經邦之略極於四遐運沉深先

物之幾妙於百中金甌獻卜芝檢疏榮於天下宰一
新文昌萬化之源以人中傑迥出漢廷諸臣之右便
從黑頭厯郭令中書之考直至黃髮給孔光靈壽之
扶如某者老境蹉跎窮途栖屑墮井誰肯救而又下
石馬餘燼寧復然猶有溺灰者卒賴造膝一言之重
俾出填溝九殞之餘洪惟此恩何以論報側聆誕告
尤激懽悰實副卿大夫百執之具瞻豈止愚不肖一
夫之私喜

賀左丞相啟

邵公濟

伏審誕膺顯冊進秉鈞衡朝野流傳廟社增重恭惟
某官勲庸載在王室道德格于皇天持海上之節
來歸白首而典屬國起渭水之濱入輔黃髮而亮武
王功蓋一時名著百世恥君不及堯舜茲茂著於嘉
猷當饋恨無蕭曹遂無開於聖慮行見鞭笞四夷而
禦侮庶幾振舉百度以仰成輿論所期斯言可必某
侵尋暮齒託脩藩維自愧亡奇遂占陽城催科之考

庶義它日及見鄭公仁義之行

賀湯丞相啟

黃伯淵

顯被絲綸寵還機軸節彼重瞻於巖石炳然載仰於
台符禮絕百僚歡傳四極恭惟 某官乾坤間氣社
稷元勳依兩朝日月之光慶千載雲龍之會坐鎮雅
俗江左謂之風流名播遠夷天下繫乎輕重方當亡
力圖於恢復豈巖廊久輟於經綸雖周人無以我公
之歸然謝傅當為蒼生而起以授機破敵固難測於

謝安而艸詔指縱將獨決於德裕爰制難於千里之
外將信威於兩河之間虜已在夫目中河可運之掌
上某欽聞顯命喜溢卑悰益馳燕厦之誠緬想鳳池
之峻燮調多暇氣序寢清願精寢餽之調式副簪紳
之望

賀湯丞相啟

宋仲山

對敷宸冊登用冢司依兩朝日月之光華得千載風
雲之感會龜鼎增固朝野寢和恭惟 僕射樞密相

公德格天淵忠衛社稷翼存雷而出震霈霖雨以濟
商進膺虛左之求深聳處中之望蓋衮職有闕惟仲
山甫能補之若世事極談見管夷吾無憂矣故威名
獨重於它相而風采益動於遠夷揭機柄以不移煥
台躔而愈耀用真儒無敵天下遂有若周公之功約
諸侯先入關中必能堅高祖之意中興可待遠業攸
歸某久託洪鈞欣聆顯命屬遠縻之使指仍阻綴於
賀班九列無堪固難入翹材之館三書欲上願將登

光範之門抃躍之私敷陳罔既

賀張丞相啟

林豈塵

欽膺宸冊進陟台衡聳巖石而具四海之瞻秉洪鈞
而為萬物之播平章雖舊渙汗維新恭惟 僕射都
督相公道德正傳天降大任作傅野之霖以蘇厥旱
洗虞淵之日而夾以飛方從鷓閣以重登詎許鳳池
之久奪風操可記想不忘嘉正之名沈厚有謀蓋惟
恐來之之老况關中賴蕭何而鎮撫於天下繫裴度

之重輕當乘君子大有為之時能辨羣臣不可及之事
事歷中書二十四考其在于今復兩河三百餘州可
立而待某跂聆顯命喜集重衿以青天白日而知其
清明惟春風夏雨而出於造化依炎州而羈迹望光
範以馳情相印命珪雖阻桃林之賀彫戈錫盾願賡
淮蔡之歌

賀陳丞相啟

洪景伯

伏審蔽自淵衷寵還魁柄胡人南下運籌思漢傑之

才丞相西來奠枕慰周京之望敵情未戰而先沮師
氣不作而自疆竊以大寒而索衣裘雖失禦戎之備
巨川而作舟楫豈無濟世之圖是故雍熙河北交兵
而趙忠獻復踐於首台康定陝西用武而呂文靖再
登於元宰玩四夷猶兒戲爾迄底咸寧仰二公若神
人然詎令專美方醜類犯邊而孔棘况冢司虛位以
誰籌事有至難類拯溺救焚之舉人惟求舊屬扶顛
持危之才恭惟少保僕射相公一代真儒兩朝元

老臯陶甚德見堯舜而知之蕭何大功與閔散而爭
矣如非烟祥風而物被緣飾若青天白日而人知清
明方慈闈之倚平值逆亮之送死首顛廟算用堂上
之奇兵坐攻虜營起舟中之敵國逮相重華而協帝
悉將眾美而効君具隆巖石之瞻勇遂急流之退大
臣惟郭令身獨繫乎安危外國於晉公使每詢其用
否適丁多故允賴壯猷詔札使輶繼催入覲命珪相
袞仍即外除遂荒東魯之封併本西樞之柄方將駕

馭諸帥無飛揚跋扈之雄總領羣公有輔贊彌縫之
用庶幾復文武之境土豈但撻秦楚之甲兵某夙賴
洪鈞聳傳華渚巖廊揆策方圖開闢之勲清廟薦詩
願揭揄揚之思

賀左丞相啟

汪聖錫

伏審播告大廷晉登上宰峻班儀於左棘首揆路於
中臺四夷聳聞九鼎增重伏惟賢推名世道富經邦
嶽降神而生申寶維周翰帝賴弼而得說用作商霖

變故屢更精忠彌著掃除內亂高五龍夾日之勲攘
卻外虞成一馬渡江之業方輔宣於法駕將經畧於
神州具錦遽興扁舟徑去屬分江而謀帥乃扶鉞以
臨戎羽扇綸巾已坐清於妖祲命珪相印蓋疊賞於
元功矧獨兼文武之資宜並注安危之意逮聞虛位
果趣賜環非衣之謗何傷有袞之思咸屬顧乃心王
室喜魁柄之重歸而戮力中原任皇家之再造天時
有待物望攸同某跡滯一涯神馳數仞聆制麻而相

慶曾無瘴海之殊引賓履以交趨獨歎翹林之阻其
如瞻頌莫盡名言

賀丞相啟

沈清

八年政府軍國之効昭然一日宰司天人之心允若
維相有作繫時所尊雖上天不肯隱默以生成雖人
主不敢輕忽於付與適求既往率開厥先意令舉世
以心知庶使居位而人服或反拔木之風以彰其任
德之實或生同穎之禾而告以共政之符或肖形象

而求於巖穴之間或假卜筮而取於漁釣之內聳以甚神之迹壓夫至眾之情處臣鄰之極而天下莫敢望焉得夷夏之悅而賢者然後安此至若興王之佐欲為經世之圖每致嚴於始進之時直有待於眾定而出處莘郊非三聘而莫起卧草廬至屢顧而後興居東山者甘蟠屈以俟其逢遇黃石者亦徘徊以觀其可落落風雲之會寥寥歲月之傳謂言元首之股肱實係黎獻之耳目聽爾眾言之可否卜吾國勢之

重輕宜茲授受之兩艱良恐信服之不易欽惟二月之廷制冊拜一朝之宰臣聖皇專御殿以致禮貌之殊宮禁亟授麻以揚功業之盛百辟肅恭而俯聽班行私語而說文忠萬姓踴躍以歡傳走卒齊聲而稱司馬士子以主盟之有賴爭濡毫以草慶歷之歌詩裔夷以夙昔之所聞每遇使而問晉公之年紀是何普天之下洋洋而有喜色蓋由在位之久事事而合眾心自初睿主之隆興即仰真儒之特起一紀雍容

於從橐歷年端委於廟堂二十六載之設施雖由聖
斷千百萬言之啟沃孰若公多始以文章而發帝業
之光中以鯁亮而主國論之是偉矣敢言之氣卓然
難進之風規模已定於前時問望豈惟於今日追伊
張葛謝之出處起大名於乾道之先奮臯夔禹稷之
事功當重任於淳熙之後而况湛然之清識更尤超
爾於人羣視富貴以無心顧萬鐘何加於我聖持守
之有道雖一介不取於人惟踐履行今世之甚難故

敬畏非它人之可比孰不履地望隆獨重於太山如
彼觀天日覩唯尊於列宿以人心歸向而為輔弼以
歲時積久而茂功名首開闢於治源力扶持於公道
舉措動遵於成憲發揮皆自於聖謨三事變更萬務
畢舉頃參持於國柄辯章斷斷以惟平暨專領於使
權績效昭昭而益著逆折胡酋之氣至今巢穴以遁
逃盡清狂士之謀坐使邊陲之安靜世已行者皆久
長之至計日深究者多致遠之良圖作礪之金愈煉

而愈精乘國之航愈操而愈固豐功塞乎天地之大
貴名揭乎日月之高其効若斯不相何待彼昔賢厥
初而欲行己志故多遲疑於向背之間惟我公已試
而深得眾情宜茲鼓舞於除拜之日天心克享無煩
影響以示人君意式孚不假勤渠而詔下於皇盛事
盡掩前聞恭惟 丞相佐時聖皇齊古碩輔求諸典
籍居相位者不為無人究厥勲庸如門下者能有幾
數惟宗社遺無疆之慶故皇家得不世之賢矧光前

事業之居多而于今名位之弗稱倬彼雲漢既忻滿
月之瞻譬如北辰共快魁台之指咸願得天而久照
始將與國以同休某夙被陶戈今逢時至念納溝之
失所恩已戴於言前倘在野以旁招願不遺於人後

聖宋名賢五百家播芳大全文粹卷四十七終

聖宋名賢五百家播芳大全文粹卷四十八

賀啟

賀葛知院除右丞相啟

陳安行

右府五兵之本夙倚壯猷中台萬化之元聳聞真拜
舉窟穴黎元之眾泊措紳韋布之流久矣具瞻茲焉
起舞恭惟 特進大丞相先生圭璧無瑕之器棟梁
特異之材智周事物而躬好問之誠才裕經綸而無
滿假之志蚤蜚英於清切旋闊步於禁嚴秋官之總

祥刑民以無犯春宮之位端尹道斯可尊從容辰告
之猷密勿夜前之席遂登丞弼妙贊機微經武整軍
於閒暇之時圖事揆策於笑譚之頃孰相公朝之初
政無踰舊學之元臣方將彙進人才以興起治功厚
培邦本以惠綏遐邇邊防必責實而剗具文之弊吏
治必核真而革滋偽之姦蓋平時抱負之傑然故今
日設施之易耳導以經術陋漢帝之禮望之格于皇
天如成湯之學於伊尹某疎庸一介茸陋眾人念曩

緣蒙特達之知凡進用率提撕之力茲化鈞之廣播
諒鑛質之無遺鸞鳳冲霄正爾仰成於忠力燕雀賀
厦豈惟永戴於旃幪依嚮采勤敷陳莫既

賀朱丞相啟

汪彥章

豈布策書寵還魁柄昔周公未復頗遭四國之流言
今裴令來歸當使兩河之聽命天下相慶朝廷益尊
恭惟 某官望絕措紳勲書彞鼎學博而知要明古
今治亂之原才全而不形得天地中和之氣昨屬羣

凶之擾允資一相之謀禍泯胚胎變消肘腋蓋厥初
同德惟尹躬之暨湯果於變成功安劉氏而必勃越
從分陝久輟贊元帝憂堂陞之勢凌人恨衮衣之歸
晚方時多事疇協濟於蕭規宜我老成首光膺於說
命再幹洪鈞之化一新巖石之瞻某早辱眷知欣聞
登用屬拘攣於印紱阻趨拜於門墻歲律戒寒巖廊
多暇冀謹寢饗之節永為宗社之休

賀朱丞相啟

鄭載仲

聿膺大冊進拜元台慶本朝之得人想中興之有日
傳聞四海驩喜一新恭惟 某官覺在民先行為世
表罄忠嘉而許國懋勲業以格天大纛高牙暫寄九
江之屏翰繡裳赤鳥遄陶萬化之鈞衡出入係皇猷
之重輕猷為實蒼生之性命幹旋大柄熙然春天下
之秋恢復中原廓爾泰邦家之否行其素蘊副此具
瞻某逝守郡符阻趨台屏永言欣頌實倍等倫

賀湯丞相啟

熊子復

伏審嗣皇圖舊真相秉鈞當食而歎蕭曹既倚宗臣
之重制挺而撻秦楚何憂敵國之強休聲不約而皆
同和氣非召而自至竊考本朝宰府之故事有若先
正所公之迭為天聖初來既踐昭文首台之位景佑
再入乃屈集賢次輔之居雖官職之小殊而相業之
益盛矧惟今日度越前人恭惟 平章僕射相公驚
代鍾才際天蘊識初心道德必期整頓于乾坤餘事
文章尚堪黼黻于雲漢夙佐光堯之治寔隆復古之

勲中暫去于廟堂旋既歸于帷幄北伐張仲在矣內
既委于居留東郊君陳往哉外更煩于綏撫適際飛
龍之造亟興甘雨之思召自燕閑還居翊亮仲虺相
湯為左昔正登庸召公主陝而西今同夾輔謀契沉
幾之運益恢遠馭之圖任良將而邊境必安拒壬人
而蠻夷自服用續經邦之業仍收闢國之勲某猥抗
塵容逖瞻潭府簡書是畏自憐學術之荒捶楚或辭
尚托化鈞之播

賀梁丞相啟

林豈塵

伏審渙號楓宸奮庸槐位惟龍首八十而五得黃扉
衣鉢之傳今鳳歷二百有餘為清源桑梓之盛傾朝
歆艷載路游揚本遠業之攸先實中興之所係竊以
黃帝得六相各有使以為之治成周建三公不必備
而惟其人我 皇朝舊制則襲隋唐僕射之名 聖
天子更化而復秦漢左右之號繫稱謂之鼎正在注
想之深勤房杜之能斷善謀惟深知而相濟姚宋之

守文應變斯為治以同歸聿圖承助之賢協運燮調
之化載颺新命式慰具瞻恭惟 某官道得正傳天
畀大任衰然為首洋洋晁董公孫之言懋哉惟時濟
濟稷契臯陶之遜方爰立而置諸右於當今所捨其
誰履富貴之塗而素所行處功名之地以藏諸用聳
巖石節彼南山之望列布衣嬪然上衮之榮對安輿
而起居復見回班之禮扣閣門而關白坐聞宜祿之
呼故事一新師言胥慶某側聆異數喜溢叢衿雖溝

渠無望於青雲然奴隸皆知其白日俸祿給以衣食
將不忘數年封侯自見之恩冠劍拂其塵埃敢竊以
三日待公奉酬之詠其為欣抃曷既敷陳

賀魏丞相啟代

熊子復

伏審妙簡前旒嬪躋上袞論相為重久稽夢卜之求
得君既專亟峻鼎槐之任萬機有助百辟無譁竊以
泰符相比於天階宰職共持於國秉官不必備或曠
歲以久需人皆曰賢則崇朝而並進仰稽昭代卓有

宏模景德之缺位累旬始同除於寇畢熙寧之虛席
數月方對任於王韓邈前後以罕聞亘古今而僅見
恭惟平章僕射相公自天降任與世作程杖節申
盟夷狄叩五原之塞揮毫演誥文章追三代之風逮
登贊於經綸亦兼陪於宥密詠天保采薇之什克佐
永圖較神爵甘露之年聿彰成績果膺枚卜益副具
瞻陳五利以和戎已繼家聲於莊子同一心而輔政
更追世績於弱翁庶臻復古之勲茂天格天之業是

為希曠孰與等倫某自攝使於畿都及為郎於省戶
皆由恩紀未有報國茲聆大號之揚寔倍常情之喜
萬間廣廈已幸芘於憇蒙一氣洪鈞尚冀陶於垓北

賀陳丞相啟

揚萬里

登庸正人使宅次輔非難得宰相之位進賢則其國
安不必問太平之期用公則其効敏天有所待世或
未知恭惟 某官續洙泗以後之淵源追唐虞未遠
之人物動容貌以肅天下已皆趨風舉夷夏而直曾

中了如觀火召來兩地亦既三年所揆愈大而合愈
難求去者堅而留者眾觀其守道之如許不付之大
事而其誰用之小遲是以國人懷不滿之意試之既
効然後明主有必信之心右席久虛君子是荷宜有
遠略用宏雋功治道無它正在一正君之妙學敵人
易與終將九頓首於大庭某自知其迂敢速於售抱
賈誼積薪之疏空有狂言哦少陵看鏡之詩真成半
老獨特知己不虛此生北道之秉洪鈞豈謂千齡之

遇東閣之來眾彥未應一士之遺

賀右丞相啟

王宣子

伏審誕宣中制播告路朝褒言增袞繡之華進秩副
魁衡之量凡居陶冶罔不忻愉伏惟 某官嵩華並
高淵泉含潤稽古之力純粹以精致君之心直方而
大潛有上前之啟沃發為天下之輝光丙魏扶本始
之隆姚宋翼開元之盛不猶一體相待而成雖曰二
人同歸于治果被都俞之命更升顯奕之階位冠疑

丞功裨造化某屬分符竹難望履綦顧頌詠以何勤
豈編摩之可究

賀范丞相啟

秦少游

光奉明恩進陞右弼伏惟慶慰恭以 某官器兼文
武學備天人出處繫一時之安危議論為四海之輕
重臨大節而不奪雖小善之必為荀氏羣龍慈明為
最河東諸鳳伯裒尤奇投閑散而問望愈隆涉憂患
而精誠益壯果濟世美簡在帝心昔執鴻樞既致干

戈之戢今居端揆何難禮樂之興坦然眾正之路開
行矣太平之責塞某叨分符節辱在陶鎔陪班謁以
無緣第承風而竊抃

賀右丞相啟

孫仲益

伏審褒進台司誕揚顯冊天佑一德惟伊暨湯運際
千齡生申及甫措紳胥悅黎獻交欣恭惟僕射相
公清明冲瀆剛毅沉塞親逢上聖服在邇塗惟文昌
萬化之源上熙帝載而僕射百僚之長下竦民瞻果

符夢賚之求亟正鈞衡之拜漑七年之旱方資傳說
之霖噢十日之寒咸向趙衰之日治道清靜王路坦
平聖心仰成國勢增重某門墻舊物湖海餘生辱知
感甚於脫驂聞命喜深於折屐衣雖敝而可改常叨
起廢之恩冠已挂而莫彈但切歸榮之任

賀朱丞相啟

孫仲益

玉冊疇庸金甌獻卜老成人在位朝廷自尊大賢者
得時善類交慶竊以履百年熙洽之運雖章句之儒

坐守而有餘當九重宵旰之憂則聖哲之臣馳騫而
不足惟時用舍實繫安危故委重何啻於萬鈞而幾
微不容於一髮視已陳之迹則因陋就寡烏足以有
為非常之言則駭眾驚愚亦難於慮始班君奇策尚
謂平平耿侯大言猶為落落必盡破拘攣之議乃大
收閔閔之功恭惟 僕射相公巖巖社稷之臣挺挺
帝王之輔爰屬艱危之寄首膺攷謹之求深惟注意
之隆實預扶衰之義崧嶽周邦之翰獨專神柄之雄

龜蒙魯國之瞻益壯坤輿之重不動聲氣斷大事於
笑談之頃不作聰明運沉幾於禍福之先稽古道而
思有宜於今合眾謀而不必出諸己茲謂中興之佐
實為後事之師某頃備省曹嘗參文柄窺絕足於羣
龍之廐仰高名於千佛之項顧畿疆有百舍之遙詎
門墻無一日之雅側聆誕告益竦遐瞻屏迹窮閭顧
莫下望塵之拜馳書東閣尚能修事大之恭

賀蔣丞相啟

洪景伯

伏審嗣聖簡求真儒柄用官不必備久當機務之煩
人皆曰賢遂正鼎司之重仍併顯於宥密寔盡付於
經綸朝野具瞻華夷允賴竊以思民被堯舜之澤伊
尹自任而不辭願我為管晏之功孟子當路而必恥
惟輔相規摹之既大則朝廷氣象之一新恭惟僕
射樞密相公學擅儒宗才推王佐入踐鑿坡而素優
於潤色首陪巖朝而備於贊襄如崔相之除吏員既
公薦舉若丙吉之按邊瑣亦預科條果登正於宰司

用增光於祖烈况十事說天子早已見於責難則一
代為宗臣即遂聞於專美某逝聆宣制猥絆乘輶阻
陪賓客之趨曷勝寤寐之喜其如辭訥莫盡意誠

賀朱丞相啟

張全真

伏審大廷敷號舊弼登庸宿望昭宣慰蒼生之傾屬
同心翊戴扶黃屋以尊安中外懽愉華夷驚服竊以
九重旰食軫國步之迍邐四海疚心歎人謀之回遹
急赴功則攘臂以事兵力膠於應變則拱手以須天

時類失厥中無益於治宜得魁壘豪傑之士以為經
綸康濟之圖人固患於難知政莫先於任舊恭惟
某官學窮道奧識探幾先德度恢宏撓汪汪之陂而
不濁才猷敏達遊恢恢之汜而有餘曩警蹕之時巡
倚鈞衡而爰立一德始熙於帝載元兇遽亂於國經
八柱承天即正高明之位五龍夾日灼知潛授之功
功扶顛談笑之餘遠列江河之上謗書一篋何傷丹
宸之深知細札十行旋趣絳車之入覲適英晝訪宣

室夜前衮衣繡裳既喜歸於姬旦命圭相印復加禮
於裴公固應展畫於遠猶豈復規圖於近效裕民積
粟以固基本詎專兵力之強嘗膽枕戈以修政刑亦
戒天時之泥將見運籌帷幄以決勝於千里端委廟
堂以為準於百僚沃心清燕之間拭目中興之盛某
頃陞從橐嘗蒙慰薦之私比解藩符復忝交承之契
仰止熒煌之座稱慶无階蕭然衰病之縱依歸有所
祇聞新命喜倍常情

賀右丞相啟

蒲大受

伏審中頒紫詔載陟黃扉登用舊人交修庶政維帝
攸賚實民所瞻固有懽聲徧及率土恭惟 某官望
隆柱石明照著龜以博通應變之才躋侍從於神考
作新之日以夷險不回之操參弼諧於泰陵紹述之
時出入三朝裁成百度欲踐繼志之實思聞補袞之
言乃自江湖歸參帷幄尚謂密資於啟沃不若顯置
於廟堂果敷綸言克協眾聽君陳申命固多告后之

猷千秋既封必有富民之効某受知敢久被德已深
復以遲暮之年再託陶鈞之地適居符竹阻造門闌
不勝燕雀賀厦之心竊有犬馬戀軒之志喜深載躍
望極增馳

賀右丞相啟

周行可

聿膺顯制進拜懋官伏惟慶慰恭以 某官碩德渾
剛忠誠隱厚氣節堅乎金石功名著於鼎彝決應變
之機上所敬憚講順流之法民以乂寧江河疏道德

之恩藻大明帝王之制邁我一德為時顯猷考諸朝
野而有成功謀之士夫而無異論是推茂興以答元
勳巖扉靚深袞服炳蔚式示具瞻之美足昭爰立之
光某夙隸陶鎔遠聆贊拜終更甚適展慶有時踴躍
懦忠倍萬常品

賀丞相兼樞密使啟

毛柏穎

冕旒發悟頌渙汗於九門袞繡來歸總樞機於二府
協朝僉之素望壯邊瑣之威謀用君子為邦家之基

進善人得天地之紀璽書誕告輿頌交欣竊以乘龍
御天聖主比隆於光武如魚有水元臣訂美於孔明
昭然信順之符盛矣明良之會昔虜騎襲淮壖之後
屬鑿輿巡浙右之初封豕長蛇肆毒尚憑於牧圉城
狐社鼠嘯凶忽起於蕭牆天步艱難人情睥睨強藩
巨鎮莫敢誰何故老元臣更相歎息相公建義旗而
糾合揮憤笏以激昂首倡大謀盡夷群醜廓清氛祲
再垂日月之光膺受寵榮大啟山河之誓方且念荆

吳之形勢顧秦蜀之上游身踐戎行豈憚櫛風而沐
雨心存王室每懷就日以望雲暴露五年憂勤一節
流言起於二叔愈見周公之忠年貌問於四夷難淹
裴度之用果膺綸命再踐鼎司舊壁壘而舊鼓旗得
臨淮而增重錫弓矢而錫斧鉞褒踐土以加優不日
而成為天所贊恭惟 某官柔惠且直昭明有融學
窮百氏之淵源文貫六經之矩矱含章以從王事許
身無愧於伊周達可之謂天民致主每期於堯舜議

論必稽於皇極經綸悉本於帝謨致廣大而盡精微
獨造真儒之効總方略而壹統類乃凝哲輔之勲茲
大用於巖廊遂永清於海寓糾逖王慝既正藁街之
誅誕將天威遂通榆塞之阻戡夷多難者定中區告
九廟之神靈還兩宮之警衛龍樓問寢盡三朝孝養
之歡鳳輦還都受四海貢輸之富增煥雲臺之象遂
陪日觀之封赫然近古以來未若我公之懿某周旋
頗舊抃踴實深桑榆雖迫於頽齡燕雀願棲於巨蔭

彈冠結綬尚陪光範之簪裾抱槩懷鈞庶幾文昌之
筆札

賀丞相兼樞使啟

方雲翼

顯膺茂冊兼領鴻樞冕旒之眷寵深隆簪紱之觀瞻
益竦聲傳飛驛喜浹遐陬竊以三公之尊政無不統
二府之設職乃有分秉國鈞則務在平章處機庭則
獨司宥密且文事武備之必有固宜合軍國於一權
苟出將入相之可為孰若注安危之兩意恭惟 僕

射樞使相公天降大任道得正傳聳巖石而慰四海
之瞻運洪鈞而為萬物之播汝作舟楫汝作霖雨顧
所用之如何視若手足而視若腹心本相須而無間
以人主之職論乎一相而天下之守在於四夷將資
制敵之能復畀本兵之重運籌決勝高祖謂不如張
良惟斷成功憲宗乃能用裴度中興可待遠業攸歸
某辱在下風欣聞成命屬處南州之地遠陪東閣之
趨且桃李無言緬想成蹊之舊燕雀至賤敢忘賀履

之情

賀吳樞使啟

汪彥章

光膺冊命進陟樞庭謀若著龜投千載功名之會心如金石為兩朝社稷之臣當日月之繼明乘風雲而特起國須賢立天為時生恭以某官厚德鎮浮英材經遠以天地浩然之氣潛養于中以古今作者之文悉臻其表爰自踐揚之始每勤納獻之忠立朝未反於中年舉世咸推為舊德昨屬殊鄰之擾上貽當

以之憂夕烽既徹於甘泉清蹕將遊於汾水唯公夙夜與國存亡由從之周行決纂承之大計方獨處雷霆之下有難言父子之間雖黃屋非帝堯之心固宜及此然逆鱗在神龍之領誰敢嬰之非二三秘策之前陳使百萬精兵而奚益宜彼軍之喪氣知吾國之有人委曲請盟逡巡退舍九重根本得英公賢於長城四海生靈微管仲吾其左衽方至上清明之今日實邦家希濶之昌期欲眾賢同建於事功非雅望

孰為於師表將萬世維持之是賴何一時康濟之足
言云云

賀韓樞使啟

汪彥章

光膺詔冊進陟機廷既廊廟之得人知朝廷之能國
恭惟某官清名籍甚雅望歸然四世五公門閥獨
高於天下十事九律計謀有補於國家編揚清近之
班深結聖神之眷徇翔滋久僉屬實勞惟豪傑之士
無待而興難稽經濟况公侯之家必復其始果被東

求某早辱誤知欣聞休命屬拘繫於印綬阻趨造於
門墻暑令清微政塗豐暇冀謹鼎茵之節永為宗社
之休

賀呂樞使啟

歐陽永叔

顯膺寵典登進樞廷成命始行輿言僉允伏惟某
官存誠直諒蹈道中和學臻三代之英世濟八人之
美論思獻納已多補益之勤謨明弼諧久韞經綸之
業三朝著遇一德老成尚虛黃閣之居姑正紫樞之

之位坐籌帷幄方資制勝之謀正席釣台始慰巨瞻
之望顧惟衰朽早辱知憐維與蒼黔同深慶抃

賀王樞使啟

熊子復

伏審渙揚大冊晉擢真儒二柄對持極隆稱於宥府
萬樞獨運助英斷於嚴宸廟算一新郵傳四出竊以
聖常求於該輔時罕建於元樞慶歷之佐或銳以圖
功則必得杜正獻之矯亢皇祐之弼方權以濟務則
亦有龐莊敏之鎮浮如洪河春漲而砥柁不搖若碧

漢夜闌而長庚有爛皆正機廷之使號旋更宰路之
官儀我思古人復見今日恭惟 樞使相公挺生曠
代特立清朝渾渾無涯道極聖涯之遠堂堂不撓才
充邦棟之隆方游華禁則特達而徑遷及處峻廊則
周旋而徧歷樞機周密既亮采而日嚴輔贊彌縫每
含章而時發氣塞兩儀而直養元害智周庶彙而曲
成不遺姑首贊於籌帷即平遷於揆席某早窺崇仞
晚托洪鈞固知弗為管晏之功將盡行於所學况以

屢陳堯舜之道尚親見於此時

賀虞樞使啟

耿元鼎

伏審貂璫趣道歷坤維萬里之長袞繡還朝陟乾道
元樞之貴眷威名之特盛加體貌以惟隆斷由當心
之心喜動在廷之色邊陲加肅廟社增榮竊以九德
知人莫難乎三事大夫之選五岳摠務尤重夫六鄉
司馬之權必其抱經緯之全才乃可注安危之兩意
况人主職論一相于以簡當軸之賢而天子守在四

夷所覲獲偃戈之慶苟非宿望曷副疇咨僉言我公
傑立當世諒維驪慰恭以 樞使相公先生勲高一
代名震萬方容止可觀所謂大臣者謀猷必告豈曰
小補哉洵揚英雋之躔自結顛昂之睠取武城二三
策志清中原得結輩十數公天降大任擢自詞林之
妙參陪法從之華督府揮犀嘆夷吾於江左留都典
鑰仰蕭相於關中丹青旋憶於老臣閭闔再朝於黃
道至每為絳侯而目送謂不得臯陶為己憂方欣要

路之登已遂急流之退重輕所繫難稽謝傅於東山
安否何如即訪裴公於西維召從綠野超拜洪樞既
夙興以在公亦朝夕而納誨漢高決勝千里獨子房
參帷幄之謀舜帝有臣五人惟伯禹荷股肱之託嗣
聽絲言之出會觀鼎足之承永慰其瞻共觀爰立某
早登崇仞竊拜下風列屬憲臺聿密承於謦效備負
帥幕更叨被於陶鎔當盛事之播聞欲中宵而起舞
凡骨念當家之鼠不隨雞犬以昇天後時漸失旦之

雞方効燕雀之賀厦其如欣悚莫究敷陳

賀虞樞使啓

孫正之

伏審上心圖舊中詔疏恩趣駕鋒車擢冠樞省豐才
裕國不在茲乎偃革安邊自今始矣恭惟 某官千
齡間出一旦親逢富貴初非本心功名蓋其餘事明
白洞達濁涇貫清渭不可湮而緇碩大剛方長劍倚
太行不待扶而直壘書屢及門而躊躇四顧使輶促
就道而俯僂三辭道之將興與當仁不讓天之未喪

也舍我其誰勉應側席之求亟正元樞之拜大安國
步護諸將於爪牙之雄遠瞻王靈制百蠻為股掌之
玩某空嗟大耋莫睹高明比貢蕪辭獨蒙褒借側聆
誕告尤激懽悰東閣加招顧已孤於榮願南山高仰
猶獲預於遐瞻欣抃之私占陳曷究

賀王樞使啟

馬子才

誕告明廷延登近弼運籌決勝久分疆場之憂當軸
處中遂正廟堂之位折衝雖舊注意惟新恭以 某

官稟氣雄剛受材英特任心膂爪牙之寄積旂常鼎
鼐之勲惟文武以兼資故君臣而默契昨屬羽書之
急親煩幕府之行軍容一陳士氣百倍殄萬里憑陵
之寇安兩淮震擾之民累歲賢勞蟣虱幾生於甲冑
一朝醲賞貂蟬果出於兜鍪某早託餘光欣聞異數
偶左府之拘綴阻東閣之進趨暑令方新政塗多暇
冀謹寢饗之節用承旒宸之休

賀徐樞使啟

李粹伯

光膺寵命入秉鴻樞廊廟自高有人豪之在位搢紳
相語喜君子之得時 某官學通天人氣阻金石議
論文章動臻乎意表死生禍福不入於胷中兜曹知
白日之清明學者愧介丘之迤邐帝於裴度寄天下
之安危人以謝安卜國家之隆替果陪光輔實久具
瞻某久辱誤知欣聞休命屬守符之拘綴阻賓閣之
進趨詠頌徒深敷陳罔既

賀秦樞使啟

汪彥章

顯膺綸綍進陟機廷唯賢哲之奮庸實廟堂之增重
庇庥所逮鼓舞攸鈞竊以北斗冠乎樞躔垂諸天象
夏官揔乎兵政著彼國經當公朝閑暇之辰居右府
近密之地仰禕至治允屬英髦恭惟 某官智略淵
深神丰嶽聳瑞聖時而間出鍾賢運以挺生較藝棘
圍素號人中之傑標名桂籍果先天下之儒爰簡清
衷亟躋華貫掌書祕府典禮奉常翰苑揮毫妙極辭
章之選邇英進讀益加體貌之隆繫經綸之宏才宜

文武之兼用延登帷幄式贊鈞衡方君臣慶千載之期而父子有同時之遇誠為盛事負絕前聞某側聽郵音限居官守想熒煌之座徒劇觀瞻託塊北之鈞愈深踴躍永言頌詠曷罄編摩

賀王樞使啟

王介甫

璇璣上列齊七政以均和帝袞輔成欽四鄰之基命親逢華旦允屬宗工恭惟某官與國忠純夾邦明哲對越光華之旦居然文雅之宗簡在上心鬱為時

棟雍容某闈嘗密贊於睿謀參貳宰司多委成於治體奮庸甚盛注意特隆屬恩詔之誕頒分鎮臨之重寄居留神甸為表則於四方寵進樞庭當折衝於萬里聲教所暨慶抃率同某俯念空疎夙叨存記縮縣章而祇役望君幄以勞懷共聽吉音豈勝至願

賀富樞使啟

毛伯穎

伏審進圖舊德入正洪樞威動殊方慶交多士恭以某官智周事表覺動民先卷舒兼文武之謀猷出

處格古今之事業盡性之學濬游夏之淵源致主之
功軼夔龍之軌躅謗讒並起而不失乎正夷險薦更
而愈見其賢召自江湖進陪軒陛仰迪光明之學密
資弼亮之謨與其置諸勸講帷幄之間曷若登於折
衝廟朝之上具瞻攸在睿眷弗為有韡棣華並調金
鼎紹八元之逸駕冠二府於同時蓋惟不世之異人
宜錫非常之殊寵益隆勲德永載彛常某猥以頑冥
夙叨知遇沉疴疲蕭方甘蓬艾之窮居顯渥便蕃增

賁桑榆之暮景悵門墻之阻遠跼鑿寢以增勞忽聽
召除果符輿頌奮起已疲之力願効指蹤圖惟未報
之恩更期畢命永言欣幸實陪等夷

賀吳樞使啟

葛魯卿

恩霈中宸榮登府朝廷增重寰宇交驩竊惟宥密之
司實領機微之務總理軍務緝熙帝猷鑿斗運而當
樞佐天事而尚武中資廟筭外擢王靈宜得真儒來
副異選非有經綸之望曷膺寤寐之求恭惟 某官

性稟誠明學該微妙言為邦之興替身任道之污隆
文章百世之宗師風采三朝之元老千齡際運為堯
舜之君臣一體同榮陋機雲之兄弟優承睿眷密贊
兵機即展秘於龍韜自收勲於麟閣國勢永依於柱
石民心方庇於陶鎔暫執鴻樞即居元宰某限拘文
禁莫展慶儀徒掃舍人之門阻待先生之席心同燕
賀仰窺大廈之成志於躍金正倚洪鑪之造其為并
詠實陪等夷

聖宋名賢五百家播芳大全文粹卷四十八終



